



HEID

SOLD MA NAUSGEH

~ DE BAVARIAN IMMIGRANTS ~

12. D'SUN

MUSIK: STEFAN KNOLL / HERIBERT HAIDER
TEXT: HERIBERT HAIDER

1. D'Sun scheidn schee
Kunn nimma gscheid schau
S'Lebn laft dahi
Grod wira Traum
Der da/ma a Glück bescheert
Dass da/ma ganz andaschd werd

Ref
I genieß so an Dog
Und präg man guad ei
Du woasdas ja nia
S'kunnt der letzte sei

2. Meine Kinda san do
Und nehman si Zeid
Vabringans mid mia
Mei Herz werd ganz weid
Wos ma a Glück bescherd
Dass ma ganz andaschd werd

3. I bsuach meine Leid
Wos de richtig gfreid
Wo d'Liab übaspringd
Und s'Herz ganz laud singd
Mia is so a Glück bescherd
Dass ma ganz andaschd werd

4. Drum nimm da de Zeid
Füa ois wos di gfreid
Füa Leid de du mogsd
Dassd soibsd dia entlocksd
Mia is so a Glück bescherd
Dass ma ganz andaschd werd

Genieß so an Dog
und präg dan guad ei
du woasdas ja nia
s'kunt Dei letzter sei

HERIBERT HAIDER / GESANG, WASCHBRETT UND KOFFER
STEFAN KNOLL / GITARRE, GESANG, AKKORDEON, SAXOPHON
SIMON ACKERMANN / KONTRABASS
ISTVAN GALUS / GEIGE
DENISE WEISE / GEIGE, TROMPETE UND GESANG

1. BLÄD

MUSIK: SESTORKA TRAD.
TEXT: HERIBERT HAIDER

A
bläd derfsd scho sei,
bloß z'hoiffa muaßt da wissn,
bläd derfsd scho sei,
alloa des is koa Grund ned,
muaßd hoid wos draus macha,
bläd derfsd scho sei,
bloß z'hoiffa muaßd da wissn.

B
und wannsd aa bläd bisd,
muaßd hoid wos draus macha,
und wannsd aa bläd bisd,
muaßt hoid wos draus macha,
muaßt da z'hoiffa wissn,
bläd derfsd scho sei,
bloß z'hoiffa muaßd da wissn

2. STÜRZ DI

MUSIK: STEFAN KNOLL / HERIBERT HAIDER
TEXT: HERIBERT HAIDER

Dua so ois waar s'Lebm jedn Dog nei
Stürz di ins Lebm, bring di oafach nua ei
Sieg wiara Kind oiss ois warads ganz nei
Stürz di ins Lebm, bring di oafach nua ei
Stürz, stürz, stürz di, stürz di nei,
Stürz, stürz, stürz di, stürz di nei,

Mei Großvata selig
I hob n ned kenn
Doch mei Vada hod ma
Vo eam scho vorgschweamnt
Scho der hods woi gwusst
Wias Lebm funktionierd
Und wia ma im Lebm
Am Lebm noch gspiard

Jetz leb i mei Lebm
Laaf am Goid hintaher
Hob gor koa Zeid
Zum sei oafach mehr
Valier mi im Lebm
Laaf eam nua hintaher
Und sehn mi de ganz Zeid
Doch oafach noch mehr

I möcht jedn Dog
wia ois Kind wieda sei
Ausn Bett aussa hupfa
in Dog oafach nei
Jedm Bam, a jeds Bleama
jedm Viech hintaher
Wos do is, genießn
ned woin oiwei mehr

3. S'GSCHIEDHAFERL

MUSIK: STEFAN KNOLL / HERIBERT HAIDER
TEXT: HERIBERT HAIDER

Er is a Gscheidhaferl
Ko ma wirklich vo eam song
Er macht si wichtig
Duad di mit seim Wissn blong
Und wanst ned aufbasst, is oans gwieß
Dasda der wieda aufn Säckl ganga is

A jeda von uns kennt so oan
Ders Mei ned hoitn kann
Und übaroi und olle Zeid
A Meinung muaß a hom
Egal ob du des wissn mägst
Wos er do dad amoi doa
Er bindt da s' auf
hod aa amoi Recht
Du denkst bei dia alloa

Doch neilich, ehrlich konns scho song
Hob i eam koid dawischd
Und hob eam ziemli klar gmacht
Wos er für an Schmarrn aufdischd
Do sogt doch dea zu mia
I konns no gorned glam
Des wos ma i oft denkt hob
Und putzd mi richtig zsam

Du bist a Gscheidhaferl
Des muass i da jetz song
Du machst di wichtig
Duast a jeden damit blong
Und bass ma jetz guad auf
Wei oans is gwieß
Dass du mia richtig aufn Säckl ganga bist

Wos i im andern sieh
Des trog i soibst in mir
Drum moan i aa nur jedn Dog
Zum Spiaglbuid vo mia

Du bist a Gscheidhaferl
Koma wirklich vo mia song
Du machst di wichtig
Dua a jeadn damid plong
Und wannst ned aufbasst, is oans gwieß
Dasda du wieda aufn Säckl ganga bist

4. SCHAUG AUFFE

MUSIK: STEFAN KNOLL / TEXT: HERIBERT HAIDER

Schaug auffe do zum Mond
schaug auffe zu de Stern
Schlupf eine in de Nocht
S Lebn hod di grod so gern

Schaug auffe do zum Mond zu de Stern
de lachan di heid o und san da ned so fern

Schaug auffe do zum Mond und de Stern
de lachan uns heid o, de san uns ned so fern

de Nacht is erwachd und hod Frieden brachd
dass Herz wieda lachd und oissam leichter macht
des Lebn kunndad ja so schee sei,
derf ma ned bläd sei
s is uns gebn, miass mas nua leben

Schaug auffe do zum Mond
schaug auffe zu de Stern
Schlupf eine in de Nocht
S Lebn hod uns grod so gern

5. GFREI DI

MUSIK: STEFAN KNOLL / HERIBERT HAIDER
TEXT: HERIBERT HAIDER

I woab echt nimma, was i glab
Und glab boid nimma, was i woab
Denn oiss werd täglich widerlegt
Wos gestern war, is heid a Schoaß
War ma scho am Mond
Oder machans uns des vor
Gibts an Klimawandl
ham de Kia damit zum doa
Is de Erd'n rund
oda flach wias friara war
Ham de Rotschilds olle Macht
und is des lang scho klar
Lesn konnst den ganzen Dog
und schlaua werst doch ned
Ehrlich gsoqt mia is des
lang scho zbläd.

Es is egal, was wer wann glaabt
Es gibt auf dera Wejd
Ja eigentlich nur oans zum doa
Des kost aa gor koa Gejd

Gfrei di dassd schnaufa konnst
dass dei Herz schlogt
Dass deine Ohrn no hean wias Bluat duachejogd
Gfrei di, dassd laffa konnst
singa und plärn
Denn wennst di gfreist
Werds Lebn a Freid werd'n

Gfrei di am Andern
Und wann's dem geht guad
Gfrei di an dem,
Wosd im Moment duasd.
Gfrei di wenss rengd
Und Gfrei di wanns schneibt
Gfrei die auf Nacht
Und wenn d'Sun lang do bleibt

Gfrei di aufs Frein
Dann werds Lebn a Freid werd'n

6. SIMMA

MUSIK: STEFAN KNOLL / HERIBERT HAIDER
TEXT: HERIBERT HAIDER

Vui Mist baut in meim Lem scho
Vui zschnoi mi oft ergebn scho
vui zweng an mi aa denkt no
vui zvui für andre gmachd scho
jetz fui i mi so laar scho
aus mia werd echt nix mehr so
Vui z oft mi sejba vogessen
Nua an de Andern gmessn
Oiwei noch aussn gschaud
Mia sejba ned vertraud
Des dra i jetz moi um so
Weil des werd ma aa z dumm scho

Ja des werd ma aa z dumm scho
Des dra i jetz moi um so
Jetz werd ma sejba traut scho
Werd mehr noch innen gschaud no
Ned an de andan gmessn
Mi sejba ned vagessn
I muaß nix werd'n i bin scho
Und bin ma sejba gnuas so
Werd statt für andre mit gmachd
Werd an mi sejba mehr dachd
Ned z'schnoi mi oft ergebn scho
Und Mist bau i trotzdem no

Mei werd des schee amoi anders
Scheena ois wia wo anders
Wei oissam werd dann klar
Dass des a Simma war
Mei werd des schee amoi anders
Scheena ois wia wo anders
weil oans is langsam gwieß
Dass s Lebn a Simma is

7. AUTOFAHRN

MUSIK: STEFAN KNOLL / HERIBERT HAIDER
TEXT: HERIBERT HAIDER

I fahr so oft mim Auto rum
Und ehrlich deng ma ständig
De andern Fahrer san echd dumm
Nur i fahr sehr lebendig
Do kriachans doch mit 80 gladd
Auf jeder Landstrass rum
Und wann mi dann da Ärga backd
Dann schrei i aa amoi rum
Jetz fahr du Depp
Und steh ned auf da Strass
Du bist so bläd
Jetz steig doch moi aufs Gas
Wei wenss so weida gehd
Kimm i moi wieda z'späd
Jetz fahr, du Depp
und steh ned auf da Strass
Du bist so bläd

Jetz mähd i aba friedlich sei
Und ned aa no im Auto schrein
Und hob ma ebbas übalegd
Wia des moi besser gähd
Wias näxte moi i auf da Strass
Muaß wiedermoi gebn richtig Gas
Damit i kimm ned z' späd
Wias ma so öfters gähd
Do fahrns scho wieda
Konns kaum glaam
De andern olle Schmarrn nur zsam

Schee langsam bin i wuadig gwornd
Hobs gmerkd wia hochsteigd glei mei Zorn
Doch hob mi an mei Lösung gmachd
De i mia hob ghabt guad ausdachd
Und hob weils glücklich machd
mi schnoi ans Jodln gmachd

Die Autofahrt war schnoi vorbei
und i war glücklich nebnbei

8. HEID

MUSIK: STEFAN KNOLL / HERIBERT HAIDER
TEXT: HERIBERT HAIDER

Heid soidd ma naus geh
oafach ins Freie
naus ausm Haus
nei in d'Natua
oafach mim Bam redn
oda mit de Veigel
dass mas Lebm gspürn
oafach ganz pua
Draust auf ana Wiesen
oda am Boch
gern a im Woid drin
spür oafach noch
Spring in da Sunn
Danz mit da Lufd
schau nei in Himme
schau ei den Dufd

D Wejd is so schee
gibt da so vui
wennst das onimmsd
drin bleibsd im Spui

Heid soidd ma frei sei
oafach oiss macha
was ma sunst ned dan
richtig laud lacha
hupfa und springa
laud dazua plärn
und ganz laud singa
olle soins hearn

D Wejd is so schee
gibt da so vui
wennst das onimmsd
drin bleibsd im Spui

Heid soidd ma naus geh
oafach ins Freie
naus ausm Haus
nei in d'Natua
oafach mim Bam redn
oda mit de Veigel
dass mas Lebm gspürn
oafach ganz pua

Heid soillt ma naus geh
D Wejd is so schee

9. SONG KANNT

MUSIK: STEFAN KNOLL / TEXT: HERIBERT HAIDER

Wenn i's da song kannt, dadadst du des wissn
wenn i's da song kannt, wissats du des aa
Wenn i's da song kannt, dadadst du des wissn
ja und er aa
Wenss du's ma song kannst, dadat i des wissn
wenss du's ma song kannst, wissat i des a
Wenss du's ma song kannst, dadat i des wissn
ja und er aa

1. mog da vazoin, kunnt da ned gfoilln
Flache Erde mei, oanerlei, flach oda rund
hauptsach gesund

Wenn ses ma song kannt, dadat i des wissn
Wenn ses ma song kannt, wissat i des a
Wenn ses ma song kannt, dadat i des wissn
ja und du aa
Wennas da song kannt, dadats du des wissn
Wennas da song kannt, wissats du des a
Wennas da song kannt, dadats du des wissn
Ja und i aa

2. Muich in Plastik, Plastik in Muich
Kaffeewegwerfbecha wer wuis
S'Mittlmeer wundaschee zum Badn nei geh
wann ma ned flüchtn muaß z'Fuaß

glaab i des jetzt oder woab i's doch liaba ned

3. unsre Waffn gehn so guad
wen wundert's das ma flüchtn duad
und so mancha bombt ganz gern
mit Drohnen aus der Fern
schiabm ma Waffn hin und her bitte sehr

Wem kann ma glaam, wer hod denn rechd
sovui kriegst mid, ned oissam is schlechd
wem soi i glaam, was is ned schlechd
egal wos i dua, ned a jedm is s rechd

Wenn ses uns sogn dan, damas oisam wissn
Wenn ses uns song dan, oissam klar
Wenn ses uns song dan, damas oisam wissn
ja dann waars klar

4. Bevor ma nix dan ruck ma zsam
S'Gejd hod d Machd bis krachd
D'Erd' übastehd da Mensch woi gehd

glaab i des jetz, oda glaab is doch liaba ned

10. DIRE DARE

MUSIK: STEFAN KNOLL / HERIBERT HAIDER
TEXT: HERIBERT HAIDER

Lossts uns doch amoi oiss anders macha
Dire Dare Mire Mare umasunst
Olle gscheid duachschnaufa,
Moi wieda richtig lacha
Dire Dare Mire Mare umasunst

Harz IV is vorbei
Unds Aufstocka aa
Vo Haus aus kriegst jetz a Gejd
Für a Doch übam Kopf
Und zum Essn no aa
So laft von jetz an de Wejd

Dire Dare Mire Mare umasunst
Soillt ma uns jetz olle amoi leistn
s Lebn bleibt deszweng oiwei no a Kunst
Doch wars amoi besser für de meistn

Klar, das jeda arban dearf
Wana arbadn mog
Oda weils eam Spass macht
Weils eam guad duad
weillas guad duad
jeder derfs entscheidn
oda lossts hoid bleibn

Dire Dare Mire Mare umasunst
Soillt ma uns jetz olle amoi leistn
s Lebn bleibt deszweng oiwei no a Kunst
Doch wars amoi besser für de meistn

Sicha werds dann owei no
Reiche, Arme gebn
Nua dass dann de Arma
Würdig kanntn lebn

Loßts uns doch amoi ois anders macha
Dire Dare Mire Mare umasunst
Olle gscheid duachschnaufa
Moi wieda richtig lacha
Dire Dare Mire Mare umasunst
Dire Dare Mire Mare umasunst
Soidd ma uns jetz olle amoi leistn
s Lebn bleibt deszweng oiwei no a Kunst
Doch wars amoi besa für de meistn

S'Lebn bleibt deszweng oiwei no a Kunst

11. HABERN

MUSIK: STEFAN KNOLL / HERIBERT HAIDER
TEXT: HERIBERT HAIDER

Drei-ho-e-ho-e-ho Drei-ho-e-ho

Wann di da Habern sticht
Is meistens ned im Gsicht
Vui meahra is s im Sinn
steckt Unsinn drin
Dann mächt das Wissn meist
werst dann oft ziemli dreist
dann konns da scho bassiern
Dass s da oane schmian

Doch so a Watschn
Haut di ned aus de Latschn
Manchmoi ruckts da dein Sinn
Grod wieda hin
Woab s drum ned
Bin i bläd
Moan i s z' guat
Foid ma Muad
Oda wars grod ned schee
Dass s hod do wäh

Wann mi da Habern sticht
Foid ma mei eings Gleichgewicht
Häng i im Unsinn drin
Vadrahts ma mein Sinn
Und dann a Watschn
Haud mi ned aus de Latschn
Doch nimmt de ned wahr
Wos mit mir war

Drum mächt i jetz song
Koana soi zuaschlong
Weil oans is gwieß
Dass s depperd is
Klar duad des ned lang wäh
Und i konns aa vasteh
Dass grod in dein Sinn
Basst mei Unsinn ned hin

Klar duad des ned lang wäh
Und i konns aa vosteh
Dass grod in dein Sinn
Basst mei Unsinn ned

WWW.BAVARIANIMMIGRANTS.DE